

Gabinete Wever-Croes:

Pa 1 di juni meldpunt pa abuso ta na vigor, cu mas facilidad pa haci denuncia

ORANJESTAD – Ayera, durante un conferencia di prensa ofreci pa e medionan local, prome minister Evelyn Wever-Croes, Glenbert Croes minister di Asuntonan Social y Labor, Andin Bikker minister di Husticia, Dangui Oduber minister di Turismo, Salud y Deporte, Rudy Lampe minister di Enseñansa, Ciencia y Desaroyo Sostenibel hunto cu sra. Carmen Herrera, director di Fundacion Proteatro Aruba, a papia tocante e situacion di abuso di mucha cu a sosode durante e ultimo fin di siman, y e plan cu Gobierno tin pa evita mas abuso den comunidad.

Prome minister a comenta cu den ultimo dianan a conoce varios caso di abuso sexual di mucha, locual a causa hopi reaccion den comunidad. El a bisa cu mayoria di ministernan cu tabata presente, desde cu nan a drenta den gobierno aki, nan a haya cu ta existi un negligencia riba e tema, y for di eynan nan a cuminsa traha riba e Crisis Plan.

Di mesun manera, el a manifesta cu e Crisis Plan ta atende e crisis, y cu nan a cuminsa traha riba e prevencion di e tipo di abuso aki. E no ta un problematica facil, ta un problematica delicada, y segun prome minister a sigura, ta importante pa hende para keto cu ta un prioridad number un tur dia pa percura cu e muchanan wordo protegi. El a referi cu e cifranan cu nan a haya ta cu 90% di caso di muchanan cu a wordo viola of abusa ta door di un persona conoci pa nan, por ta un amigo di cas, un amigo nobo di mama of door di un omo, etc.

Wever-Croes a bisa cu pa combati e fenomeno aki, por cuminsa pa evita 90% di e casonan aki door di wak miho na unda e mama ta laga su yiu, cu cual persona y kico por haci pa proteha e muchanan. E otro 10%, manera prome minister a señala, mester keda pa gobierno haci su trabou. E ministernan ta ocupa pa cambia e diferente ley y proceduranan cu mester bin, pa asina percura pa castigonan por ta hopi mas severo, e castigonan mas halto pa cada caso. Wever-Croes a papia di introduci un cantidad di luna minimo pa e abusado bay cera, agregando cu kier cambia e ley pa asina e profesionalnan (dokter, maestro, etc.) no wordo persigui si nan a entrega un keho.

Minister di Asuntonan Social y Labor, Glenbert Croes, pa loke trata e tema aki a expresa cu nan a yama e Crisis Team, cu ta esunnan cu ta traha cu e guia y trabou intenso di e Crisis Plan. Croes a splica cu e problema aki ta multi-ministerial y disciplinario, y loke a pasa den ultimo dianan ta un momento di reflexion pa Gobierno, pa wak si nan ta haci suficiente pa percura pa atende e cu e asunto aki.



Igualmente, el a bisa cu nan mester mantene e curso di Social Crisis Plan, acelera e plannan cu nan ta sinti cu na e momentonan aki mester acelera e decision y proceso corecto pa cana, pa sigura cu por tin un Aruba liber di abusanan asina.

Di su parti, minister di Husticia Andin Bikker a referi cu pa loke ta trata husticia, esey ta e ultimo parti, cu basicamente ta pa castiga e persona cu a faya den e comunidad y pa e criatura.

Den esey el a manifesta cu nan a haci un analisis profundo di kico por cambia den e ley.

Por ehempel, Bikker a splica cu na prome punto, e meldpunt cu ta denCodigo Civil 2016, den e concepto di e codigo aki a decreta cu dia 1 di juni, e meldpunt cu ta entre otro articulo 243 A te cu C ta bay drenta na vigor, y esey lo encera cu por ehempel, un profesional cu den su ambito constata abuso, no mester tin miedo di bay

haci melding y señala esaki. Di dos punto ta cu nan a ripara mediante un estudio cu e castigonan riba e hecho castigabel aki ta hopi abou.

Otro punto cu el a bisa cu nan ta cambiando cu eCodigo Penal nobo di 2012, a pone cu e persona cu a haci e delito mas pio cu ta existi, automaticamente e di dos tercera parti nan a sinta castigo y nan ta bin di remarca pa haya libertad condicional. Bikker a sigura cu nan a ricibi un comunicado di parti di Cuerpo Policial, cu ta señala cu desde januari di aña aki te luna di mei, ta existi un total di 33 sospechoso cu a wordo deteni pa crimen contra menor di edad di diferente forma, y a base di esey, nan a conclui cu ta keda un asunto alarmante.

Igualmente Dangui Oduber, minister di Salud, Turismo y Deporte, a manifesta cu cada caso di abuso sexual di mucha ta conmove comunidad y ta un preocupacion cu ta biba cerca di tur hende. Gobierno tin e deber y obligacion pa haci tur loke ta na su alcance pa preveni pa e casonan aki di tuma luga, y tambe pa esunnan cu a comete e acto immoral por haya e castigo cu nan merece.

Oduber a comenta cu ministerio di salubridad a presupuesta placa pa set up e 'back office' pa e melding wordo haci den caso di abuso sexual di muchanan y di otro tipo di abuso sexual tambe. El a splica cu e intencion ta pa busca un dokter di confianza cu ta on call 24ora pa dia, banda di esaki lo busca enfermero pa asisti y asina tambe busca trahadonan social pa ricibi e victimanan.

Tambe el a sigura cu nan lo bay traha hunto cu Kinderen Jeugd en Zeden Politie, pa asina tin un central meldpunt, caminda den confianza cu e victimanan, por haci nan melding y e investigacionnan por tuma luga.

